



Afar seguit pel secretariat

Tolosa, 25 de junh de 2025

secretariat@ieo-oc.org

Lo President

president@ieo-oc.org

als Presidents de las seccions

Dònas presidentas, sénhers presidents de las seccions de l'IEO,

Coma o sabètz, foguèri elegit president de l'Institut d'Estudis Occitans lo 27 de mai passat, coma candidat independent, al cap d'una equipa - totalament paritària -, venguda d'horizonts diferents mas unida per la volontat d'obrar per l'occitan e la consolidacion de l'IEO, nòstra associacion comuna.

Coma ja diguèri, puèi escriguèri dins lo mot qu'adrecèri a totes los aderents de l'IEO lo 5 de junh passat, prometi pas ren, levat, espèri, de trabalhar. D'efièit, lo trabalh ja manca pas e las oras se comptan pas. Nos estructuram pauc a pauc qu'es la prioritat que nos sèm fixada en mai de nos acarar a unas urgéncias que nos casèron dessus e que nos'n seriam passats. Parli, bèl primièr, del degalh de las aigas al local de Puèglaurenç, consecutiu als violents auratges del 19 de mai passat. Aquò significa que lo tet del bastiment es de cambiar de tant qu'es afrabat e que mai d'unes libres ne patiguèron.

La campanha de premsa qu'avièrem dins la mesada passada nos menèt qualques ressons (per exemple, <https://www.lepetitjournal.net/82-tarn-et-garonne/2025/06/10/une-nouvelle-equipe-pour-linstitut-detudes-occitanes/>; https://www.facebook.com/MichelFeltinPalasSurLeBoutDesLangues/photos/patrice-poujade-nouveau-pr%C3%A9sident-de-linstitut-d%C3%A9tudes-occitaneshttpswwwlepetitj/1273105094301645/?_rdr; https://lamanyana.cat/elogi-der-ieo-e-de-patrici-pojada/), segurament pas pro, mas cal ben començar. Tanben, la campanha mai institucionala nos permetèt qualques contactes mai, que siá amb lo president de l'Acadèmia aranesa de la lenga occitana, lo del Congrès permanent de la lenga occitana o lo director de l'Ofici public de la lenga occitana. Rescontrèri los dos darrièrs la setmana passada.

Desmest las prioritats del moment, a despart de l'organizacion, son las edicions que nos ocupan per tal d'onorar los engatjaments ja preses. Après, l'estructuracion qu'èra al còr de nòstre projècte concernirà tanben lo pòl editorial per arribar a desgatjar una politica editoriala e un procediment clarament definit entre las proposicions recebudas e las òbras publicadas.

Per çò que tanh a las seccions, en particular departamentalas, volèm demandar a caduna de nomenar un correspondent que servisca de ligam amb l'IEO Federal per far remontar, tot còp que siá necessari, las informacions d'interès general que la letra d'informacions que volèm publicar pro regularament poirà difusar a l'ensemble dels aderents de la ret. L'interconeissença

e l'escambi d'informacions son importants, tanplan fundamentals, e permeton, tanben, de poder bastir en comun. Es çò que desiram.

Dins lo meteis sens, volèm promòure la “Conferéncia de las seccions”, importanta iniciativa ja existenta, una conferéncia dins la man de las seccions que ne definirà las tèmas discutits, las datas e la frequéncia, mas que tanben deuriá servir al nivèl federal per conéisser la situacion de cada seccion, las iniciativas e, dins la mesura del possible, de las sosténer e, almens, las far conéisser. De la Conferéncia de las seccions ne pòrián tanben nàisser de projèctes comuns capables de federar mai d'una seccion e, perqué pas, venir de vertadièrs projèctes federals.

L'objectiu de conéisser melhor las seccions e de las associar mai a la reflexion generala nos mena a prepausar una “consultacion” que sèm a elaborar, destinada a aver una idèa mai precisa de las “fòrças” de la Federacion tota e, tanben, dels problèmas rescontrats. Es important que cada seccion, de quin nivèl que siá, responda a aquela consultacion quand siá prèsta.

Tanben, lo meteis objectiu - ja exprimit dins lo programa que presentèri - se tradusirà per l'organizacion de rescontres dirèctes entre ieu e los membres del burèu disponibles, e los presidents de seccions departamentalas, dins quatre a sièis recampaments “regionals”. Aquelas trobadas serà destinadas, a l'encòp per aprendre a se conéisser, saber çò que se fa dins l'ensemble del territòri, escambiar sul projècte e l'accion de l'IEO Federal, reculhir las idèas e cobastir d'accions comunas al servici de l'IEO tot. Vos contactarem, quand siá lo moment, per ensajar de las organizar, en tot esperar que i arribem.

Demest las causas que voldriái promòure a tèrme cort, s'es possible, seriá l'organizacion o co-organizacion d'unas manifestacions bèlas del tipe “Nuèit de la cultura occitana”, portadas per unas seccions departamentalas mas al servici de l'IEO tot e promogudas e sostengudas pel nivèl federal de l'IEO, dins un esperit de mutualizacion. Ne val de la visibilizacion e d'una cèrta mediatizacion de tales eveniments al servici de la lenga e de la produccion culturala e artistica occitana. Es un punt que m'agradariá de poder discutir amb las seccions que serián interessadas per n'estudiar las possibilitats de realizacion.

Enfin, aprofieiti aqueste messatge adreçat als presidents de seccion per far una crida, non solament per designar un correspondent “comunicacion” dins cada seccion per far de ligam entre lo Federal e la seccion, coma ai explicat çai-sus, mas tanben per que poscatz informar los aderents de vòstra seccion que las comissions anonciadas se metran en plaça dins las setmanas a venir e que, ja, los voluntaris pòdon pensar a lor participacion. Remembri las comissions religadas als pòls del burèu:

- “relacions ‘exterioras’”
- “transmission e socializacion de l'occitan”
- “valorizacion e difusion de la recèrca”
- “publicacions, edicions, difusion”
- “difusion culturala e artistica”
- “organizacion”
- “comunicacion”
- “tresaurariá e finançament(s)”

Lo secretariat es a vòstra disposicion per totas las questions relatives a l'organizacion, per tota demanda o contacte; vos podètz metre en relacion amb el a través aquesta adreça: secretariat@ieo-oc.org.

Sabèm, malurosament, que, per fòrça d'entre nosautres, lo periòde es dificil e plen d'incertituds. L'IEO Federal i escapa pas e, compte tengut dels pauques mejans a nòstra disposicion, esperam comptar sul sosten de tot lo malhum coma, nosautres, vos asseguram que, dins la mesura de nòstras possibilitats, comptaretz sul nòstre. En tot cas, los obradors mancan pas e nos i retrobarem ensems.

Vos mercegi de vòstra atencion, demòri a vòstra disposicion e espèri de nos poder totes retrobar a l'entorn d'un projècte fòrt per l'IEO e l'occitan.

Ben coralement.



Patrici Pojada
President de l'Institut d'Estudis Occitans